



Broj: PD-167/25

Sarajevo, 14. 11. 2025.

PRIMLJENO: 20-11-2025.			
Organizaciona jedinica	Klasifikaciona oznaka	Redni broj	Broj priloga
01-	150-1-	2492/	25

PREDSTAVNIČKI DOM

PARLAMENTARNE SKUPŠTINE BOSNE I HERCEGOVINE

n/r Predsjedavajućeg

PREDMET: Inicijativa Ministarstvu vanjskih poslova Bosne i Hercegovine za upućivanje diplomatske note Ambasadi Republike Turske zbog govora mržnje, vrijeđanja i izražavanja netrpeljivosti prema Turcima i svim muslimanima, od strane Milorada Dodika, bivšeg predsjednika bosanskohercegovačkog entiteta Republike Srpske

Poštovani,

Na osnovu čl. 166. i 170. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22, 59/2, 87/23, 50/24 i 56/25) podnosim Inicijativu Ministarstvu vanjskih poslova Bosne i Hercegovine za upućivanje diplomatske note Ambasadi Republike Turske zbog govora mržnje, vrijeđanja i netrpeljivosti prema Turcima i svim muslimanima, od strane Milorada Dodika, bivšeg predsjednika bosanskohercegovačkog entiteta Republike Srpske (u daljnjem tekstu: Inicijativa) koja glasi:

“Pozivam Ministarstvo vanjskih poslova Bosne i Hercegovine da, u najkraćem roku, uputi diplomatsku notu Ambasadi Republike Turske u kojoj će se ograditi od govora mržnje Milorada Dodika, bivšeg predsjednika bosanskohercegovačkog entiteta Republike Srpske, njegovog vrijeđanja i javnog izražavanja netrpeljivosti prema Turcima i svim muslimanima, te osuditi takav dugogodišnji narativ navedenog bivšeg funkcionera tog bosanskohercegovačkog entiteta, uz poziv da se u skladu s nadležnostima, zajedničkim naporima i sankcijama borimo za eliminisanje takvog narativa iz javnog i svakog drugog diskursa i komunikacije.”

OBRAZLOŽENJE

Nisam uočio, niti je objavljeno saopćenje na službenoj stranici Ministarstva vanjskih poslova Bosne i Hercegovine (u daljnjem tekstu: Ministarstvo) da je ono službeno reagiralo na neprihvatljiv govor mržnje, vrijeđanje i izražavanje netrpeljivosti prema Turcima i svim muslimanima, od strane Milorada Dodika, bivšeg predsjednika bosanskohercegovačkog entiteta Republike Srpske, u njegovom javnom obraćanju na predizbornom skupu SNSD-a u Lukavici, 10. 11. 2025. godine.

Podsjećam da je Milorad Dodik u tom obraćanju javno vrijeđao Bošnjake, Turke i sve muslimane govoreći sljedeće:

„Ovaj grad ne smije dozvoliti dodatnu islamizaciju. Pustite vi te priče, isti smo ljudi. Nismo ista vjera. Niko ne laže gore i više od Turčina. Tako da te sve njihove bombone koje nam daju ovdje, možete i trebati. (...) ne moram da vam govorim o tome, vi to znate. Da se suprotstavimo velikom muslimanskom

nacionalizmu koji je pretvoren i koji je inkarnacija onoga što se zove politički islam, koji nije završio svoj posao ovde. **Nije njihova Bosna i Hercegovina.** Kao što vidite, propada im priča o unitarnoj Bosni. Nema ni unitarne Bosne. Sve što pokušaju, nema. Samo iz jednog razloga. **Što nisu svoji i zato što su podanici.** Iz tog isključivog razloga. **Za razliku od nas Srba, koji to znamo, umijemo i hoćemo...** Mnogo puta sam od nekih muslimana čuo, kaže, joj, da si nam ti predsjednik. Ima jedna mala stvar, ja nikada ne bih bio njihov predsjednik. I nisam ni nikad dozvolio da me oni biraju. Meni je važno da sam ja predsjednik srpskog naroda i da me srpski narod bira. **Oni govore o tome kako je Banja Luka, Trebinje, Istočno Sarajevo, sve njihovo, lažu.... Ništa nije njihovo.** To je sve naše. Ali oni bezočno lažu, kao što Turčin laže. To njima nije problem. Nema povjerenja. Nije se moglo izgraditi nikako. Vi to znate...šta je napravljeno na Istočnoj Ilidži? **Samo je omogućeno da muslimanima tu stanuju, jel' de? Jel mislite da je sad to sreća? Pa vi to znate bolje nego ja.** Gdje se useli jedan, to je kao da amebe se usele...Moramo da govorimo o tome. Na globalnoj sceni je sukob između islama i hrišćanstva. I to je ta priča. On kaže, nije to pristojno govoriti. **Kako nije pristojno govoriti? Jer kod njih odlučujući faktor, kod njih je džamija, jel tako? Politički faktor, kod muslimana je džamija. (...)**"

Uzimajući u obzir da se govor mržnje Milorada Dodika, godinama ponavlja u njegovim javnim obraćanjima kreirajući narativ o neprijateljstvu, mržnji i netrpeljivosti prema Turcima i turskom narodu zbog naše historijske i kulturne povezanosti, smatram potrebnim da Ministarstvo uputi diplomatsku notu Ambasadi Republike Turske kako bi se i zvanično ogradili od govora mržnje i vrijeđanja Turaka, turskog naroda i muslimana od svih bivših i sadašnjih visokopozicioniranih funkcionera u Bosni i Hercegovini.

Uočavajući da bespotrebno i ničim izazvano vrijeđanje Turaka i turskog naroda, kao i svih muslimana, na predizbornom skupu u Lukavici od strane najutjecajnijeg političkog moćnika u bosanskohercegovačkom entitetu Republika Srpska podsjeća i na izjavu doživotno osuđenog ratnog zločinca Ratka Mladića: *"Evo nas, 11. 7. 1995. godine u srpskoj Srebrenici. Uoči još jednog srpskog praznika, poklanjamo srpskom narodu ovaj grad. I napokon, došao je trenutak da se poslije bune protiv dahija osvetimo Turcima na ovom prostoru"*, a nakon čega je izvršen genocid u Srebrenici, smatram da je opravdano učiniti sve napore da se narativ mržnje, netrpeljivosti i osвете prema Turcima sankcionira i zaustavi.

Prijateljski odnosi između Bosne i Hercegovine i Republike Turske su na visokom nivou, te svako javno vrijeđanje i širenje netrpeljivosti prema Turcima i turskom narodu, kao i prema svim ostalima koji žive i borave u našoj državi, zaslužuje osudu, sankcioniranje i eliminiranje iz javnog i svakog drugog diskursa i komunikacije.

Pozivam Ministarstvo da prihvati predloženu Inicijativu.

S poštovanjem,

POSLANIK
PREDSTAVNIČKOG DOMA



Jasmin Emrić

Dostavljeno:

1. Naslovu,
2. A/a.